

24 MAY 1999

Abdullah-Mahathir

BUKU "A NEW DEAL FOR ASIA" KARYA DR MAHATHIR DILANCARKAN

PETALING JAYA, 24 Mei (Bernama) -- Buku terbaru Perdana Menteri Datuk Seri Dr Mahathir Mohamad, "A New Deal For Asia", dilancarkan di sebuah hotel lima bintang di sini hari ini oleh timbalannya, Datuk Seri Abdullah Ahmad Badawi.

Abdullah. dalam ucapannya, berkata buku itu akan memberikan satu "bentuk hala tuju" kepada Asia pada ketika rantau ini mengalami perubahan yang sangat hebat.

Sambil membandingkan buku Dr Mahathir dengan buku "New Deal" karya Franklin D.Roosevelt yang dihasilkan pada 1930an, Abdullah berkata: "Asia harus merebut peluang dan bersedia untuk menjadi garang dan berani dan melakukan komitmen itu."

"Dalam hubungan ini, adalah berguna bagi kita semua untuk meneladani iltizam dan komitmen tegas perdana menteri untuk mengubah Asia. Sudah tiba masanya bagi kita semua untuk berdiri bersama-sama dengan perdana menteri dan melakukan langkah pertama yang pasti membawa kepada langkah yang lebih besar untuk Asia dan dunia," katanya semasa menyampaikan ucapan pelancaran itu.

Dalam buku itu, Dr Mahathir menghuraikan rasa kecewanya terhadap kerakusan pedagang matawang yang memporak-perandakan negara-negara Asia pada 1997 dan 1998.

Buku itu juga memaparkan isi hati seorang tokoh dunia dan pemikir ulung yang terkemuka, yang mengulas mengenai pelbagai isu kontemporari dengan jelas.

Semasa melahirkan pendapat-pendapatnya di dalam buku itu, perdana menteri berkata Asia, yang terjejas teruk akibat krisis kewangan, mesti dibina semula menerusi asas yang lebih kental berbanding sebelumnya.

"Kita mesti melangkah ke depan tanpa rasa penat dalam usaha kita untuk memulihkan kembali, bukan sahaja nilai-nilai pasaran kita, malahan juga maruah dan keyakinan rakyat kita," kata Dr Mahathir.

Dalam ulasan ringkas mengenai buku itu, setiausaha agung Persatuan Pertubuhan Bangsa-bangsa Bersatu Malaysia Dr Ian Chua berkata "A New Deal For Asia" ialah karya "yang mencabar pemikiran, menggalakkan dan memberi inspirasi yang optimis mengenai kedatangan alaf baru.

"Buku Dr Mahathir ini memberangsangkan dan telah mencetus harapan-harapan baru bagi Asia yang bermasalah, dan satu dunia yang tidak menentu. Di China dan Jepun, nama beliau disebut dengan penuh rasa hormat dan sanjungan," kata Dr Chia, yang juga naib presiden Institut Pengarah-pengarah Malaysia.

Buku setebal 155 halaman itu, yang diterbitkan oleh Pelanduk Publications Sdn Berhad, boleh didapati dalam edisi kulit nipis dengan harga RM25 senaskhah.

Pengarah Urusan Pelanduk Datuk Ng Tieh Chuan berkata sebanyak 10,000 naskhah telah dicetak dan sebanyak 18,000 lagi dalam versi bahasa Jepun akan dilancarkan di Jepun minggu depan.

"Buku ini juga akan diterjemahkan dalam Bahasa Malaysia," katanya.

--BERNAMA

ES NAK